

Nwàk nè Ba, nè Pol à Còm Fa TIMATI

Pol à còm nwàk ènə nga yi cu mɛ ndapndzəmè yìyi fana yi dzəm ngòyè Timati. A ye nga yi rì də mvə'nə yi nə kpɛ kùrə laŋ. Yi à sə cèp ghak bə ntip sè ngòtsòho ncèp nè Nwì nə. Tu ncèp nè gɛgɛŋ nə nja də, nwè nè yi dzəm-a ngòye mofàk Jisòs nè zìnə nə, yi tse' ngòye co sojà nè yi sə yu' dɛk. Yi ka tse' ngòkosə lo' marè'tu bohòŋkwà'nwè ye nè nà'a Jisos Krest nə. Yi tse' ngòye fəfuhù ngòyè ngə' bùm fàak ye sə (ye ngoo 1:8, 2:3, 2:12, 2:15, 3:11, 4:5).

¹ Còm nwàk nè'e mùɛ Pol nè mɛ ngà ntum Jisòs Krest. Nwì a fùhɛ nònɔsə yi də mɛ ye ngà ntum ye. Fàk am yè'sə də mɛ sə tsoho fa bwìŋ bə nzak lùŋ nè nà' sə vè bohòJisos Krest nə.

² Mù sə còm fa nwàk nè'e bohòwù Timati mo àm nè sə ntùù mù. Nwì nè yi tè' nə ye Jisòs Krest nè yi Tà àvèes gɛ wu bèbɔŋ, nə koksə manziŋ bohòwù, nə fa wu fifi sə ntùù.

*Pol Kwe'sə Timati
NgòFàk Gɛgɛŋ, Nə Kà Wəp*

³ Mɛ kwasègè Nwì bùm wùu Timati. Mù sə fàk bohòyi bə ntəm nè rərəŋ mvə'nə tè' am wèŋ à fàak. Mɛ lɛŋgè bohòyi maràŋ bə ndzəmè lòon də yi se wu ŋkùɛŋntèŋ.

⁴ Mũ tsərə ndzəplis yo sè wù a wa ghà nè vesù à gà'a yà'a, ntum àm sè gu mũ co mũ ye fe'lə wù səmok ya mũ kwa.

⁵ Mũ tsərə fe'ləgè mok sè' mvè'nè wù a fa ntum yòbohòJisòs bə nè zìnə. Macici yòLuwìs ànə fa to ntum ve'nə yi, nə ye də ma yòYunis fa sè'. Mù rì də wu sè' ve'nə.

⁶ Mvè'nè mù rì də wu ve'nə fana mù dzəm də mũ tsok fa wu yumok. Wu lumsə ɲkərə nè Nwì a fa wu ɲgòfàk bə zeɲ ghà nè mũ ànə naaɲ fa wu bo nà'a.

⁷ Rìɲtse' də Nwì a fa vesùwèɲ Yòɲsè ye nè Rərəɲ nè nà' gù ves a kà wəə tse'. Nà' a fa ves ɲaɲ, nə gu a dzəm bwìɲ, nə sə ko ni'.

⁸ Ye də kà də wu koksə marè'tu ɲgòtsòho fa bwìɲ liɲ sè Tà sə duk. Nə ye sè' də kà də wu koksə marè'tu bohòmù də bùusè mũ ɲgà ndapndzəm sè' duk. Yusə də wu tse' le nsàp ntum nè ɲgòkə ye ɲgə' bùu Ntirè nè Bèboɲ nə sè'. Aco wù gu to yè'sə bə ɲaaɲ sè Nwì fa wu yà' yi.

⁹ A yi Nwì nə nè yi a lùɲsə ves, nə duk ves də a cum ncu nè nà'a rərəɲ. Yi à gù yè'sə, ka də a bùu yumok sè bèboɲ sè vesùwèɲ a gù yeɲ. Yi à gù fa ves yè'sə ndzə bohòJisòs Krest ɲga yi tsəm kok gu sə vəə yi bə bòvəm ye ɲga nzenɲòn ka ntòyeto.

¹⁰ Nè niè' nè'e mvè'nè Jisòs Krest ɲgà lùɲsè bwìɲ a vè fana vesùwèɲ a rì mok bum sè Nwì a sə tsərə də yi nə gu sə. Yusə yi à vəə nə gu sə də yi à ghak ɲaaɲ kpə, nə jəɲ vè lùɲ nè nà'a nè kà mè yuk mvwe' jəja. Mandzè nè yi à jə vè nà'

à ye bə Ntirè nè Bèboŋ nə.

¹¹ Nwì a naan fa mɛ bo mɛ tuhù də mɛ tsoho sè' Ntirè nè Bèboŋ ènə. Mɛ sè' ŋgà ntum zeŋ, nə sə yə'rə fa bwìŋ sè' zeŋ.

¹² Nà'a njo nè mù sə yə ŋgə' nə. Megu də marè'tu sə kà mɛ ko bùusè mù rì ŋwè nè mù a dzəm bohòyi nə bèboŋni. Mù rì tse' sè' pap də yi tse' ñaan sè ŋgònòŋsə bum sè mù a fa yà' ndzə bohòyi sə tètè kə dzeŋ nùmbu ànə nè yi nə bwì və. *

¹³ Wù à yuk ncèp nè zìnə nè nà'a bə liŋ Jisòs Krəst nə bohòmù laŋ. Jəŋ ŋkərə də wu sə yuŋ megu zeŋ. Wu sə gù vɛ'nə, wù sə fa ntum bohòNwì, nə sə dzəm bwìŋ bùusè wu ŋwèə Jisòs Krəst.

¹⁴ Ncèp nè Nwì a fa ndzə bohòwù ènə gu nteŋ wù kà fàk. Fana ye də wu jəŋ ŋkərə də ŋwè nəmòok kà nà' kupsè bupsè. Yòŋsè nè Rərəŋ nè nà' cu ndzə ni'ì vès nə nə tɛsə wu ŋgògù vɛ'nə.

¹⁵ Wù rì də bùu sè mvwe' lak Ɛsiyà pwe' a mè'rə tes mɛ mɛmù. Fùgelòbə Emoginìs a mè'rə mɛ sè'.

¹⁶ Nwè nè yi vesi mègù Onesiforòyiìyi. Yi gùgè ntum àm sə ye fəfup. Yi kà marè'tu bə kwan am yè'e sè' koksəgè. Mù tsəm də Tàa nə se ndap ye bə nsàp nè yi sə gù ànə.

¹⁷ Yi à kè dzèŋ mvwe' lak Rumà, yi lap fok kɛ'ca mɛ vɛ'ɛ tètè yi ye mvwe' sè mù cu.

¹⁸ Mù sə lɛŋ də Tà Nwii gu Tà Jisòs ŋgòkoksə manziŋ bohòyi nùmbu ànə nè yi nè bwìŋ vèə.

* **1:12 1:12** Aco ncèp ènə sə duk də, <<Yi tse' ñaan sè ŋgònòŋsə bum sè yi a fa yà' ndzə bohòmù sə.>>

Wù rì mvè'nè yi à sè tesə mü ghà nè mü à ye mvwe' lak Efesòyà'a-e bèboŋni.

2

Ngə' Nè Ngà Fàk Nwù Nə Ye

¹ Wùu Timati mo àm, təəŋ gʊgʊŋ bə nàaŋ sè Jisòs Krèst fagè bùu ye wèŋ.

² Wù à yuk bum sè mü a sə yə'rə ke' mvwe' bwìŋ yà'a; jəŋ yà', nə yə'rə bwì fa bùu sè wo zìnə nə ye kəkərè. Bùu yè'sə wèeŋ nə jəŋ yà', nə yə'rə bwì fa bùu mok wèŋ sè'.

³ Ye ngə' ma njòco sojà nè bèboŋ bohòJisòs Krèst.

⁴ Wù rì də ŋwè nè yi sojàa kà ncu ye co ŋwè nè la'à mok cugè. Yi cugè ncu nje ngògù də ŋkwà'ŋwè ye sə kwa.

⁵ Tsərə fe'lə-a mòk co ngà cacəŋ-è. Aco wo də yi gha' bwìŋ yi, ŋga yi ka lùuk sè wo nòŋsəgè də ŋwèe caŋ ve' bə ve' sə pwe' nòŋsə à?

⁶ Ngà fàk nzum nè yi fàkgè ve'ε bə nàaŋ tse' togè bum sè yà' tesə mənzuù fi yi.

⁷ Tsərə bum sè mü tsè' fa wu yè'sə bèboŋ. Tàa nə gʊ wu wù rɛeŋ bə zeŋ pwe'fo'.

⁸ Kà swì də Jisòs Krèst nè yi à tesə bohòbùu Devid à lòkok mvwe' kpə. Nà'a Ntirè nè Bèboŋ nè mü sə tsòho fa bwìŋ nə.

⁹ Yà'a yusè mü sə yəè nə ngə' bùu zeŋ sə. Wo tasə mü yè' bə kwan co ŋwè nè yi bupsə yumok. Megu də kaco wo tasə to Ntirè nè Bèboŋ nə yeŋ.

¹⁰ Fana mü sə ye lo yàm ngə' mantombi bùusè bùu sè Nwì a cokfis wo yè'sə sè ntèŋ. Mü gʊ ve'nə ya wo dzəm bohòJisòs Krèst fana Nwì fa

wo lùŋ nè nà'a nè kà kè mè yuk nə. Fana wo nè kè tse' bum sè bə̀boŋ sè yà'a nè kà mè yuk, sè Nwì a nòŋsə fa bùu Jisòs wèŋ sə.

11 Ncèp mòok nè', nè nà' a zìnə, aco wù riŋ yòsə' də a ve'nə, də,

A kpu-a ves Krəst,

A nə lokok be'lə sè' vesiwèŋ.

12 A təəŋ be'lə-a venəwèŋ cùk,

A sak gaŋ ye sè' venəwèŋ.

A kà-a yi də yi nè njàvès jə,

Yi kà ves də vesùwèŋ sè ye sè' jə.

13 Vesùwèŋ kà-a zìnə bohòyi ye,

Yi mègù ye ŋwè nè yi yegè ye zìnə.

Kaco yi dzeŋ yuk ni' ye yeŋ.

*Fàk Co Nwì Dzəm Də,
<<Ŋ, Wù Sə Fàak>>*

14 Gù bùu yo wèŋ ŋgòtsərə tse' bum yà'sə, nə kà swì. Cèp bohòwo, nə soŋ wo ntu' bə̀boŋ mənə liŋ Nwì də wo kà mvək bə ncèep cùu sè də ŋwè nè'e riŋ ghak yi kè nà'a àlɛ' sə càsə. Nsàp ànə ka fàk tse', nà'a bupsəgè bùu sè wo yuk yà' bupsə.

15 Jihi nzòn, nə gù fàak yo bə̀boŋ ya Nwì dzəm də <<Ŋ, wù sə fàk məm̀və'nə.>> Ye nsàp ŋwè nè kaco marè'tu tesə sənə fàak yo yeŋ, nə ye ŋwè nè wù rì ŋgòkotse' ncèp nè Nwì nə bə mandzè nè bə̀boŋ.

16 Yüsə də, kà də wu tse' bo sənə nsàp taŋgàam ləm sè yà' ka fàk bohòNwì tse' yà'a duk. Mù duk ve'nə bùusè yà'a jə fəsə lògè bwìŋ mvwe' mandzè Nwì maŋkwèŋ, maŋkwèŋ.

17 Ngàam awo yà'sə yegè co nsàp mvwe' nè nà'a kà mègè, nè sə jək logə mantombi nà'a. Himiniyàs bə Filitù sə yə'rə bwij nsàap bum yà'sə.

18 Wo a jàm mè'rə mandzè nè zìnə nə laŋ. Wo sə duk kə'cà də ngòlòkok mvwe' kpə à cà lòmè laŋ. Wo gu vɛ'nə fana bùu mok wɛŋ ye ngòmərə də zìnə nə ŋga'a nè fòlɛ.

19 Bwij sə mərə-a sè vɛ'nə fana bùu Nwì wɛŋ nə təŋ guguŋ co kùumndap, yà'a nè kà kupsə yuk. Ngì ncɛp nè wo còm naaŋ mbwa nə də, <<Tà rì bùu sè yà'wèeŋ sè ye. Nwè nè yi də yi bɛ' mandzè Tà Jisòs lòoŋ, yi cokfis ni' ye sənə bup.>>

20 A yegè munda'à ŋà ghàk wù ye bum sè ngògèsə zuzu mbwa zəzok. Mok sə yà' gu nteŋ. Mok sè ka nteŋ guguŋ yeŋ co kùuŋ ncàk vɛ'ɛ. Sè yà' gu nteŋ sə, wo fis mègù ya' nùmbu nzu. Mok sə ye sè wo zɛ bum ca ghà nè fòlòoŋ nzak kà ye.

21 Ye də a ye-a ŋga ŋwè cokfis gesə ni' sənə bup yè'sə pwe' fana yi nə ye mok co yu gèsə zuzu nè nà' gu nteŋ. A vɛ'nə bùusè yi mok rərəŋ. Yi tse' mok fàk. Yi mok kəkərè co də ŋà ndap nə gu fàk bə zeŋ nùmbu nè sə bà bàa pwe'.

22 Ye də wu caŋ gesə mvwe' ŋgùu wàhabwij sè yà'a jə lògè wo ngògù bup yà'a. Jihi nzòŋ ngòkè gù mègù yusè yà'a kəkərè, nè sə naaŋ tu bohòjisòs guguŋ, nè tse' dzədzəm bohòbwij, nè ye bə fifi. Wu gu vɛ'nə ye də wù sə gù sè mvè'nè bùu sè wo yù Tà bə ntəm nè mò'fis sə gùu.

23 Kà də wu gesə cùu yo sənə bum ləm sè jì ŋkərè sè bwij sə cèep duk. Wù rì yòsè' də nsàap

bum yà'sə jə vè mègù ñkùèm.

²⁴ Nğà fàk Tà Nwì ka tse' ñgòye ñwè nè yi sè li ni ke' sənə ñkùèm yeñ. Yi nə ye tsoñ ñwè nè fùè bohòbwiñ pwe'. Yi tse' ñgòye sè' ñwè nè yi rì ñgòyərə bwiñ bèbon, nə ye fe'lə sè' ñgà kontum.

²⁵ Yi ye nsàp ñwè nè bwiñ bèñ-a yusə yi cèep, yi reñsə yà'wèñ bə fùè. Yi gu ve'nə, bùusè kàmòk aco Nwì kupsə ntuum bùu yà'sə wèñ wo riñ zìnə nə.

²⁶ Ya ñga ñkərè awo bwiñ vèə, wo cañ tesə sənə tam Satà nè yi ñgà bòrè bwiñ. Tam nè yi anə kotse' yà' ca də yà'a sə yuk bohòyi nə.

3

Bum Sè Bwiñ Nə Sə Gu Nga Jisòs Kuəp NgòVèə

¹ Mù dzəm də wu rɛɛñ də ghà nè Jisòs kuəp ñgòbwiñ vèə, ñgə'ə nə ye ve'ɛ wùriñ.

² Busè bwiñ nə sə gu bap wùriñ. Bwiñ nə sə dzəm megu ni' awo, nə sə dzəm mbàm; wo nə sə dzəm ñgòtsòho ke' də mɔ ve'ɛ bə ve'ɛ, nə sə ne ni'. Wo nə sə yak ke'cà bwiñ. Bweñke' wèeñ nə kà ma bə tè' mok sè' yuk. Bwiñ kà ntum nè ñgòkwasə ñwè mok sè' tse', nə kà Nwì sè' wəp.

³ Bwiñ nə kà bùu awo sè munda'à wo sè' sə dzəm. Bwiñ nə sə tse' ntum sè guəñ. Bwiñ nə sə ci' fa bùu mok wèñ mwès. Bwiñ nə sə gu lo bum mvè'nè wo dzəm nduk. Bwiñ nə sə ye ñgàa ñgwap, nə kà yumok sè yà'a bèbon dzəm lok.

⁴ Bwiiṅ nə sə borə bwiiṅ. Bwiiṅ nə kà duk sə yuk, nə ye ṅgàa koksə-ṅkwèṅ. Wo zɛ nzenḡòṅ, nə kà mvək bə yusə yà'a bəboṅ bohòNwì tse'.

⁵ Wo nə sə gɛ megu bum Nwì ma mənḡùp ni'ì, fana nə sə beṅ bwi ṅàaṅ sè yà' cu nja sə. Kà ṅge' weṅ nsàp bù ànə ko lok.

⁶ Yà'a nsàp bù nè wo gorə ni munda'à bwiiṅ bə ṅkərè. Wo ni ve'nə, nə ci' ko bàa sè wo lo'. Bàa yè'sə wèṅ bə' ku' tse' bɛp bə marè'tu ndzə ni'ì wo nə sə jip ke' bə zeṅ.

⁷ Wo sə dzəm ṅḡòyər'è rì bum, nə kà zìnə nə rì yuk.

⁸ Nsàap mbəmbaam sè ve'nə yè'e ka zìnə tse'. Wo yà'sə co bùu sè liṅ awo də Janè bə Jambri, sè wo à sə dzèeṅ duk Musi. ṅkərèə awo a bɛp yà'sə laṅ fana wo tse' dzədzəm nè nà' a jabu.

⁹ Yusə də wo nə kà səsap lònḡa bwiiṅ ko mbwèe awo laṅ. Yà'a sè' mvè'nè bùu sè ba yà'a à ye fana bwiiṅ ko mbwèe awo.

Pol Tipsə Timati

NgòTəəṅ Cùk Bə Zìnə Nə

¹⁰ Bohòwù yòTimati, wù à rì zìnə nə bohòmù. Wù rì yusə mù sə yər'è fa bwiiṅ, nə riṅ ncu àm, nə riṅ fe'lə yusə mù sə dzəm ṅḡòḡùu. Wù à yə mvè'nè mù à fa ntum àm bohòNwì, nə ye mvè'nè mɛ fùè, nə sə dzəm bwiiṅ, nə ye mɛmvè'nè ṅḡə' à sə vè bohòmù, mù təəṅ mali ḡḡḡṅ.

¹¹ Wù rì sè' mvè'nè bwiiṅ a yeṅsə mɛ ṅḡə' mvwe' bòop lak sè co Antiyòk bə lak Akonòm bə lak Listà. ṅḡə'ə sè yà' à vè bohòmù pwe' mù à təəṅ ḡḡḡṅ fana Tà Jisòs nə fis ḡesə mɛ ca lòṅ.

¹² A zìnə də, ηwè nè yi dzəm-a ηgòbɛ' mandzè Jisòs bə zìnə ye pwe', yi nə tse' tsoη ηgə' bohòbwiη.

¹³ Bùu sè bup sè wo duk bòrəgè də wo dzəm Nwì yà'a nə sè bup ghaha lo ghaha. Wo nə sè borə bwiη ηga wo sè bòrə wo yàwo sè' bòrə.

¹⁴ Nə ye də wùu Timati, dù mali mantombi bə zìnə nè wo à yə'rə wu, wù dzəmtse' cùk nə. Tsərə tse' bùu sè wo à yə'rə wu.

¹⁵ Tsərə tse' sè' də wù à rì yè jə ηwàk Nwì ηga wù cu ntòmumwenke'. Nwàk Nwì ènə zeη nè aco nà' jə lo to wu ηgòrì ηkərə, nə kə tse' lùη nè nà'a nè kà mè. Nà' tse' ηgòjə lo wu ve'nə ηga wù fa ntum yòbohòJisòs Krest.

¹⁶ Bum sè wo à còm yà' ndzənə ηwàk Nwì lòoη fo', à tesə vè bohòNwì. Yà' tse' fàk ηgòyərə fa bwiη zìnə. Nə tse' fàk ηgònì fa bwiη yusè yà'a jòη. Nə tse' fàk ηgònìtsè' fa bwiη ηgòtesə sənə jòη, nə təəη fe'lə rərəη sèmok. Nə tse' fe'lə fàk ηgòyərə fa bwiη mandzè ncu nè nà'a kəkərè.

¹⁷ Fana yà' gu ηwè nè yi fàk bohòNwì pwe' kà yusè yi tse' ηgòrì jamə. Fana yi ye kəkərè ηgògù nsàp fàk nè fòpwe'fo' nè nà'a bəboη.

4

Pol Ta Fa Timati Kpu

¹ Timati, so'rə ntu' bəboη, nə yuk ncèp nè'e. Mù sè cèp bohòwù gəgəη mantombii Nwì nə ye Jisòs Krest nè yi nè sak ndàaηwè pwe'. Yi nə sak bù kpukpù bə bùu sè wo cu ηwəm. Njo nè yi nè vè ηgòkè sak gaη ye fana mù duk wu də,

² Tsoho ncèp Nwì nè ghà nè fòlòon, nga mvè'nè sè bòo nè ye mvè'nè sè bup mwè pwe' wù tsòho. Sa'rə bùu yo wèŋ ya wo teŋsə bup awo sè wo sə gùu. Kwe'sə wo ya wo gu bum bə mandzè nè nà' a ye bèboŋ. Ko ntum nè kà teŋsè, nè sə yə'rə wo sè'.

³ Busè mvək sə vəə nè bwìŋ nè kà yəyərè nè nà'a zinə yu'rè. Wo nè sə yuŋ lo gu yusè yà' sə bòwo. Wo nè sə to benə cicàa sè wo dzəm, də ya yà'wèŋ yə'rə fa wo nsàap bum sè sə bòwo co wo yuk zeŋ.

⁴ Wo nè kà ngòyu'rə yusè yà'a zinə mok dzəm. Wo nè dzəm ngòyu'rə ke'cà maŋgəŋgèeŋ sè wà.

⁵ Nə ye də bohòwù yò, ko ni' yò, nè təəŋ bə ŋkərè ghà nè fòlòon. Nğə' vè-a bohòwù, wù ko ntum. Sə gu fàha yo co fəŋgəri nè. Gù fàha sè Nwì fa wu ngògù lòon sè'.

⁶ Bohòmù yàm, mvək njàm nè ngòkrə kùrə laŋ. Krə àm nè nà'a co mù sə fè' mà' fa Nwì dzè rùk nè fi.

⁷ Mù a lù ma njàm bèboŋ laŋ, mù a ca ca àm nè kə mesə sè' bèboŋ. Mù tə mali bə zinə àm nè.

⁸ Nè nga'a nè'e, lèlək àm cu yo bùusè mù a gù mvè'nè Nwì sə dzəm sə. Tà Jisòs Krest nè yi sakgè bum kəkərè nè nè fa mu nà' nùmbu nè yi nè vèə. Yi nè kà nsàp ènə bohòmù fa mègù, yi nè fa ndàaŋwè pwe' nè yi tes lis mandzè bə kwəkwa ngòkùk nùmbu nè yi nè bwìŋ vèə ànə.

Pol Fa Lèsə Timati Ntip

⁹ Làp mandzè, nè və kə ye mu jəjo yè'sə.

¹⁰ Dimà a mè'rə nònşə mɔ nè' mɔmɔ. Yi dzəm ngòbɛ' lòmègù mok bum sè bèbon sè sɛ nze fɛn. Yi a løyuye mɔwe' lak Tètàlonikà. Kresɛŋ a løyɛ mɔwe' lak Gàlesiyà fana Taitòs lo ye mɔwe' nzenḡon Dàlmasiyà.

¹¹ Luk cu mègù vesi mok yìyi. Wu cu ngònvə, wù jə və Mak, bəusè aco yi tesə mɔ bə fàk.

¹² Mù a tum lòTìkikòs mɔwe' lak Efesò.

¹³ Wu vəə, wù jə və fa mɔ cək àm nè mù à mè'rə nà' mɔwe' lak Truwà bohòKapònà'a. Jə və fa mɔ ŋwàak am sè'. Nə jə və fa mɔ ŋwàak fàk am sè ya' tse' liŋ yà'a ntɛŋ.

¹⁴ Alèsandà ngà tenlám nà'a a gù mɔ bɔp nsàp nè wù kà fàk. Nwii nè làk fəsə yi sè' mɔvè'nè yi a gù mɔ.

¹⁵ Sə gi yòbohòyi sè' bə ŋkərè. Bəsə yi a cèp ngògù bɔpsə Ntirè nè Bèbon nə vɛ'ɛ bə ŋàŋ.

¹⁶ Mɔvè'nè mù à təəŋ to mɔ kot mantombi fa' ngòfi'lə ncù am yà'a, wo pwe' à mè'rə tes mɔ mɔmɔ. Mù len Nwì də yi kà wo yumok bəu zen gù!

¹⁷ Tà Jisòs à ye gù fo' vesi yi. Yi à sə fa mɔ ŋàŋ fana mù tsòho rì to ncèp nə pwe'fo', ya bù lakmɔm wèen yuk nà'. Yi a caŋsə gesə mɔ mɔwe' cùu gwim.

¹⁸ Tà Jisòs nə caŋsə gesə mɔ mɔwe' bɔp pwe', nə jəŋ lo mɔ bèbon mɔwe' lak ye sè mɔbu mɔwe' dzè' ŋkum ye. Kəkùksəə ye bohòyi, nə kà mè yuk. Yà'a ye vɛ'nə.

Cècəpsə Nə Nà' Ləsə Mbwè

¹⁹ Cèpsə fa mɔ Prìsiliyà bə Akwilà. Cèpsə fa mɔ bəu munda' à Onesiforòlòŋ.

²⁰ Èratòs cu malìgè ye yà' mvwe' lak Korè. Mè a mè'rè Tròfimù mvwe' lak Militù nga yi nòyiyaŋ.

²¹ Jihì nzòŋ nè vè nga mvèk mbùŋ ka ntòvè. Èbulòbè Pudèn bè Linùs nè ye Klaodiyà wèŋ cèpsè wu bèboŋ. Bwema sè fèŋ sè pwe' cèpsè wu sè'.

²² Tà Jisòs sè kùk yòŋsè yò. Bòvèm nè Tà nè ye bohòwù sè'.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

c475d5b3-da44-51cf-93ca-f255b72fe481